

bächtiger Richter recusirt / 2c. Vñ so die Sa-
 che ihnen zu widerlauft / zu rechter zeit appel-
 lirt / die Acta revidirt vñ wider von vornen an-
 gefangen werde. Vnter dessen haben sie auff
 einer andern seitten auch gnugsam zu thun /
 daß sie Belt machen / damit sie ihre Leut auß-
 zahlen vñ zu freunden behalten / da muß man
 verkauffen / versehen / entlehen / vnd zusamen
 treiben was man kan / biß man ins Hospital
 geräht / vnd in eusserster Armut / Vnwillen /
 vnd Verzweiffelung stirbt vnd ewig verdirbt.
 Die Egyptier seynd mit zehen plagē gestrafft
 worden / nemlich mit Blut / mit Fröschen / mit
 Ingeziffer / Fligē / Hewschrecken / Finsterniß
 Pestilensblattern / vñ Ingewitter / mit Auß-
 sas vñ Tödtung ihrer erstē Geburt: die Litigan-
 tē aber seynd beynabe härter gestrafft: dan sie
 müßē ihre erst vñ lezt geborne / od alle ire Kin-
 der verlassē / ohne einige Auffenthalt / sintemal
 die Harpyiē alles auffgefressen / sie gehē allein /
 niemandt nimpt sich ihrer an / wann sie nichts
 mehr haben / vnd seyndt veracht / wie die Auß-
 sätzigen / dann auch ihr eigene Freunde sie nit
 mehr kennen wollen: Müßen auch allerhandt
 Ingewitter / allerhandt verweiß vñ vorwerffē
 lassen vber sich gehē / all ihr Einkömen ist ver-
 fallen / vnd hat ihnen der Hagel in den Beut-
 tel geschlagen: jederman fleucht für ihnen / als
 wann sie eine Pest am Hals hetten: vnd wan
 sie nur einen ansehen / so macht sich derselbige
 auß den füßen / daß sie ihm nichts heischen / o-
 der bedencken / wann sie ihnen nit entweichen
 können / mit was Worten sie ihnen ihre Bitt
 abschlagen / vñ sie von sich weisen mögen: des-
 gleichen sitzen sie stettig in einer betrüblichen
 Finsternis / niemand nimpt sich ihrer an / the-
 te wol von nöhtē / dz sie Hewschreckē / oder Ha-
 berstroh fressen / Fliegen vnd Leuse seyndt ihre
 meiste / vñnd treuweste Gesellschaft. Bene-
 ben dem müßen sie für ihren Advocaten vnd
 Anwalten verstunnen / derselbigen gnad leben /

welche sie auch mit dem geringsten / so sie noch
 vberig haben begüttigen: vnter dessen lachet
 man ihrer noch darzu / gönnet es ihnen wol /
 daß es ihnen so vbel gehet: vergleicht sie dem
 zweyen brüdern Euristheni vñnd Procli, von
 welchen Herodotus schreibet / daß sie so lang
 sie gelebet / wider einander gerechtet / vnd ihre
 Erben ihre Rechtfertigung hinderlassen. Item
 der alten Betteln Ptolemaidi deren Dioge-
 nianus gedencket / vnd von ihr saget / daß sie
 ihr ganges Leben mit zanken vnd rechten zu-
 gebracht / vnd sich nicht bereden lassen wollen /
 gaß sie davon abstünde. Item einem Hyper-
 bolo, welcher so zänckisch gewesen / daß man
 ein Sprichwort von ihm gemacht / Ultra Hy-
 perbolū, welches man von denen gesagt / wel-
 che so zänckisch gewesen / daß man sie zu keiner
 Versöhnung oder Vergleichung bringē kön-
 nen: oder einem Parno, welcher sich vmb ei-
 nen Weidnachen / den er verlohren / mit jeder-
 man zänckete / dahero auch ein Sprichwort
 entstanden: Disceptator ob Parni scaphulā,
 welches man von denen pfeget zu sagen / die
 vmb eines Daubendrecks willen / ein groß ge-
 schrey vñnd Rechtfertigung anfangen. Also
 müßen sie bey jederman den Spott zu ihrem
 Schaden darvon tragen. In welchem ich sie
 auch lasse sitzen / biß sie klüger werden / vnd in
 einer billichen Sache ehe die helffte oder weni-
 ger nehmen / als sich mit solcher Gefahr in
 Rechtfertigung einlassen.

A N N O T A T I O.

Was die Advocaten belanget: saget Cælius
 Calcagninus in seinem tractatu de rerum
 & verborū significatione vber dem Wort
 Patronus, daß es ein Vocabulum relati-
 uum sey vnd habe zu seinem correlato ent-
 weder einen bedrängten / welchen ein
 Patronus beschützet / oder einen Libertum,
 welchen ein Herr frey gelassen. Auff welche
 weise